

■ COMMENTARI

Il pievel ha uss il davos plaid

DA MARTIN CABALZAR

Cun ina disciplina rigurusa ed ina maioritad surprudenta ha il cussegl grond deliberau il zercladur vargau la Nova ulivaziun da finanzas dil Grischun. Observaders critics ein sedumandai lezza gada sch'ils deputai seigien buca surdumandai cun ina materia talmein complexa che cumpeglia 30 spartas ed in messadi da 1600 paginas. Schebein il pievel po ussa magunar ina materia talmein grev digestibla sa ins pia dubitar. E tonaton eis ei impurtont ch'il pievel hagi la pusseivladad da s'exprimer davart in project da tala dimensiun e purtada cun midadas sco strusch in auter dils davos decennis.

*A*schi necessaria che ina nova egualisaziun da finanzas ed in detretschament dallas incumbensas denter cantun e vischnauncas ei, en dus secturs va il project denton en ina fallida direcziun. La responsabladad e s'entelli era la finanziaziun dallas domenas da scola e socialesser duei vegnir adossada allas vischnauncas. Quei malgrad che la cooperaziun denter cantun e vischnauncas ei secumprovada gest sin quels secturs. Il cantun astga buca senuspir da sia responsabladad ed adossar en quei grau tuttas grevezias allas vischnauncas. Gest els secturs sensibels da scolaziun e socialesser ein las comunas savens surdumandadas persunalmein e finanziálně ed astgan per quei buca vegnir schadas amiez liug. Pitir pitescha la finala buca mo la vischnaunca, anzi era il singul.

*P*er garantir ina purschida ed in tractament paregliabel egl entir cantun ed aschia salvar l'egualitad dallas schanzas eis ei impurtont ch'il cantun detti directives e segidi culla finanziaziun. El astga buca semplamein suruchar la qualitat dalla scola, dils survetschs terapeutics ed igl accumpignament e sustegn social alla casualitad ni alla arbitrariadad dallas finanzas communalas. Grazia al referendum ha uss era il pievel la pusseivladad da s'exprimer.